



Associacion Internacionala
d'Estudis Occitans

XI^{en} Congrès Internacional
Lhèida, 16-21 de junh de 2014
Universitat de Lhèida

XI Congrès Internacional · Lleida, 16-21 de juny de 2014 · Universitat de Lleida

Tresena circulara

Cars amics,

Cars collègas,

L'XI^{en} Congrès de l'AIEO se sarra e tot se concretiza. Nos regaudissèm enòrmament de vos assabentar que lo Congrès de Lhèida es ja una bèla reüssida al nivèl de las chifras, vist que comptarà aperaquí 150 personas que presentaràn de comunicacions, demest las qualas seràn representats un dotzenat d'estats diferents e un seissanat d'universitats de tota la planeta. En fach, d'après nòstras donadas actualas, lo nombre total dels congressistas despassarà los dos centenats de participants, çò que nos fa un grand plaser, quitament s'aquò supausa un gròs prètzfach d'organizacion. Sul plan qualitatiu, d'un autre biais, cal dire que la lista dels subjèctes e dels autors de las comunicacions daissan veire que lo Congrès de Lhèida aurà una granda qualitat scientifica, que li caldrà apondre la qualitat induscutibla dels que seràn cargats de las conferéncias plenièras e dels que prendràn part a las taulas redondas. En guisa de curiositat, vos podèm dire que las comunicacions nos permetràn d'entendre parlar scientificament de la lenga e la literatura occitanas dins uèch lengas diferentas (dont lo quite occitan, que serà aqueste còp la mai utilizada).

Dempuèi qualques jorns, podètz trobar sul sit Internet del Congrès (<http://aieo2014.udl.cat>):

— Los resumits de totas las comunicacions que son estadas retengudas.

– L’orari de las comunicacions.

– Un pauc d’estatísticas sul Congrès e la lista de las comunicacions, jos la novèla rubrica “Documents complementaris”. Aquí i trobaretz tanben la letra que nos a mandat lo President de la Generalitat en acceptant de presidir lo Comitè d’Onor del Congrès.

– Lo programa definitiu del Congrès e l’emplec del temps de dimenge 15 de junh fins a dissabte 21 de junh. Vist que lo programa es mai que subrecargat a causa de la participacion al Congrès de nombrosas institucions e del grand nombre de congressistas, l’organizacion velharà al respècte escrupulós de l’emplec del temps. Totes los que presentaràn de comunicacions, seràn pregats de se’n téner a las vint minutas per lors intervencions. L’organizacion serà formala e admetrà pas d’alonguis. En fach, pregam los que presentan de comunicacions d’èsser presents dins la sala pro en avança de l’ora que lor es estada acordada, se per cas i aguèsse d’anullacions imprevistas.

– Un document que totes los congressistas pòdon descargar e qu’assegura una reduccion sus las tarifas de tren per se rendre a Lhèida. Lo cal mostrar al moment de crompar la bilheta RENFE (la societat del camin de fèrre de l’Estat). Lo trobaretz jos la rubrica “Informacions practicas”. S’avètz de questions a prepaus d’aquel document, volgatz nos contactar a aquesta adreïça electronica: fundacio@udl.cat.

Tocant lo programa, per rapòrt a çò que s’anoncièt dins la circulara precedent, remarcaretz que l’AIEO e lo Comitè d’organizacion an volgut que lo Congrès de Lhèida garde tanben d’espacis emblematics per rendre un omenatge esmovent a de figuras màgers dels estudis occitans que nos an quitats fa gaire, coma lo primièr president de l’AIEO Peter T. Ricketts, l’insigne medievista catalan Martí de Riquer o lo grand sabent Robèrt Lafont. Aquí dessús, e mai se fa pas partida del programa oficial del Congrès, cal apondre que la Generalitat de Catalonha, qu’es un de nòstres principals partenaris, a causit un dels jorns del Congrès de Lhèida per la remesa oficiala del Prèmi Robèrt Lafont, lo prèmi mai important que s’autreja en Catalonha a l’entorn de la lenga e la cultura occitanas. Aquela remesa aurà luòc dins lo quadre de la Seu Vella e tombarà lo meteís jorn que los congressistas auràn l’escasença de vialhar lo monument mai important de la vila de Lhèida.

Dins las pochetas que seràn liuradas als participants al moment de lor arribada al Congrès, totes i trobaràn una pichòta carta que lor permetrà tanben de beneficiar d'una tarifa especiala suls prèses dels transpòrts en comun de la vila de Lhèida pendent un parellhat de jorns. A prepaus d'aquò, vos remembram tornar-mai que totes les congressistas se devon inscriure individualament, e que l'organizacion tindrà pas compte de las inscripcions multiplas. Pels eventuals acompanyaires, volgatz encara contactar lo Comitè d'organizacion.

L'acuèlh *informal* dels congressistas se debanarà dimenge de ser dins lo cinèma apelat Espai Funàtic (Carrer de Pi i Margall, 26; pas luènh del Carrer Major e de la gara), ont es previst de vos ofrir una beguda d'acuèlh mai o mens originala, que precedirà l'inauguracion de la Mòstra de Cinèma Occitan, que Frederic Mistral i jogarà un ròtle especial a l'ocasion del centenari de la mòrt del poèta de Malhana. La beguda d'acuèlh aurà luòc dins una sala del quite cinèma, just a costat de l'endrech ont se tindrà l'inauguracion de la Mòstra.

Aqueles qu'auràn de mal de s'orientar dins la vila tanlèu arribats, lor donam rendètz-vos dimenge d'aprèsmiègjorn a sièis oras e mièja davant la pòrta principala de la gara (Estació Lleida-Pirineus). Dempuèi aquel endrech, partirem ensemble per se rendre a l'Espai Funàtic a l'ora convenguda.

L'inauguracion solemna del Congrès aurà luòc diluns 16 de junh, a 11 oras del matin, dins l'Auditòri del Centre de las Culturas e de la Cooperacion Transfrontalièra de l'Universitat de Lhèida, dins lo Campus de Cappont, ont se debanaràn las activitats scientificas del Congrès.

Las plaças de l'excursion a la Val d'Aran son agotadas, mas es encara possible de participar al banquet del divendres de ser e de se sèire al torn d'una bona taula amb d'autres congressistas.

Serà un plaser de vos rescontrar a Lhèida, de partejar amb vosautres l'XI^{en} Congrès de l'AIEO e de vos far descobrir (un pauc mai) Catalonha.

Esitez pas de nos contactar se vos fa mestier d'ajuda per qué que siá.

Plan coralamant,

Lo Comitè d'organizacion

<http://aieo2014.udl.cat>